



KENYATAAN MEDIA

YANG BERHORMAT MENTERI DI JABATAN PERDANA MENTERI DAN MENTERI KEWANGAN DAN EKONOMI II SELAKU Pengerusi Bersama Jawatankuasa Pandu COVID-19

1. Pada menjunjung titah perkenan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu`izzaddin Waddaulah Ibni Al-Marhum Sultan Haji Omar `Ali Saifuddien Sa`adul Khairi Waddien, Sultan dan Yang Di-Pertuan Negara Brunei Darussalam, Jabatan Perdana Menteri adalah dengan ini memaklumkan bahawa langkah-langkah pengawalan yang telah diumumkan sebagaimana sidang media Kementerian Kesihatan pada 3 September adalah dengan ini **dilanjutkan selama 14 hari bermula pada hari Isnin 4 Oktober 2021 sehingga hari Ahad 17 Oktober 2021**. Dalam tempoh dua minggu ini, beberapa strategi tambahan akan juga dilaksanakan seperti:
 - i) Agensi-agensi penguatkuasaan akan mempertingkatkan pengawasan (*surveillance*) dan aktiviti penguatkuasaan (*enforcement*) agar orang ramai terus bekerjasama dalam mematuhi arahan-arahan sekatan yang telah dikeluarkan oleh Kementerian Kesihatan.
 - ii) Orang ramai adalah disarankan dan diperlukan untuk berada di tempat tinggal masing-masing pada setiap malam daripada jam 8 malam hingga jam 4 pagi. Ini adalah untuk mengurangkan pergerakan serta risiko penularan jangkitan COVID-19. Pengecualian hanya diberikan atas urusan-urusan kecemasan dan

mendesak atau menjalankan kerja sebagai petugas kritikal (*critical frontline workers*) sahaja.

- iii) Sebagai tambahan kepada usaha yang sedang dan telah dilaksanakan, kerjasama di kalangan Penghulu dan Ketua Kampung adalah diharapkan untuk sama-sama memantau penduduk-penduduk setempat terus mematuhi segala arahan-arahan bagi mengawal penularan COVID-19; mengamalkan tanggungjawab sosial masing-masing dengan penjarakan fizikal dan tidak mengadakan majlis-majlis keramaian.
- iv) Talian '*hotline*' di Pusat Koordinasi Kebangsaan Menangani COVID-19 (N3C) yang beroperasi selama dua puluh empat jam setiap hari, dan disediakan bagi memudahkan orang awam melaporkan sebarang insiden yang didapati melanggar sebarang peraturan atau 'SOP' kepada pihak berkuasa. Berikut adalah talian-talian '*hotline*' yang dapat dihubungi:
 - 8176148
 - 8175148
 - 8166148
 - 8155148

Langkah-langkah yang akan sama-sama kita usahakan selama dua minggu ini akan dikenali sebagai **Operasi Pulih**.

2. Berikutan kenyataan Kementerian Kesihatan semasa sidang media sejak 7 Ogos 2021 mengenai dengan langkah-langkah pengawalan yang diperketatkan semula disebabkan gelombang kedua COVID-19 di Negara Brunei Darussalam, agensi-agensi Kerajaan dan badan-badan bukan Kerajaan serta sukarelawan dan orang awam telah berganding bahu dalam usaha mengawal penularan wabak ini di negara kita. Walaubagaimanapun, jumlah kes positif jelasnya masih belum menurun dan pada masa yang sama, keadaan di pusat-pusat pengasingan

semakin mencapai kapasiti yang maksima di mana pada masa ini penggunaan katil atau '*bed capacity*' adalah di tahap 78%.

3. Berdasarkan statistik-statistik yang diperolehi dalam dua bulan kebelakangan ini, didapati jumlah kes-kes positif di dalam gelombang kedua ini adalah seperti berikut: kira-kira 75% belum menerima vaksinasi COVID-19; 17% baru menerima satu dos vaksinasi COVID-19; dan hanya 8% telah melengkapkan vaksinasi COVID-19. Mengikut statistik yang ada, kira-kira 1% pesakit akan mengalami kesan jangkitan yang teruk sehingga memerlukan rawatan di Unit Rawatan Intensif (dalam Kategori 5). Setakat ini, tidak ada pesakit yang telah melengkapkan vaksinasi di dalam Kategori 5.
4. Daripada statistik-statistik berkenaan, ianya menunjukkan betapa pentingnya untuk mempercepatkan peningkatan perlindungan melalui vaksinasi. Usaha ini juga adalah penting bagi tidak membebankan sistem penjagaan kesihatan. Dalam tempoh beberapa minggu ini nanti, Kerajaan akan mempertingkatkan usaha dalam memastikan 80% penduduk di Negara Brunei Darussalam akan melengkapkan dua dos suntikan vaksin COVID-19 sebelum penghujung tahun 2021. Ini merupakan satu usaha yang besar memandangkan tarikh sasaran awal bagi mencapai jumlah 80% tersebut adalah dalam bulan Mac 2022. InshaAllah Negara Brunei Darussalam akan dapat mencapai sasaran yang disebutkan.
5. Pada masa yang sama, Kerajaan Kebawah Duli Yang Maha Mulia akan terus melaksanakan usaha-usaha bagi peralihan secara berfasa untuk negara kita keluar daripada keadaan pandemik. Kita akan berjaya melakukannya apabila semua daripada setiap lapisan masyarakat dan individu di negara ini, berganding bahu, memberikan kerjasama dan sama-sama berusaha dalam membendung penularan jangkitan COVID-19. Dengan ini ditekankan sekali lagi kepada orang ramai untuk tidak meninggalkan rumah kecuali atas urusan-urusan kecemasan atau mustahak dan bagi yang bekerja seboleh-bolehnya mempraktikkan '*Work*

from home'. InshaAllah, sesudah jumlah kes-kes positif COVID-19 mula menurun, lanya akan dapat mengurangkan tekanan terhadap sistem penjagaan kesihatan negara kita dan dapat memberikan keutamaan dari segi sumbangan sumber tenaga disalurkan untuk menjayakan program vaksinasi di negara kita. Operasi Pulih dengan strategi-strategi yang dilaksanakan adalah dihasratkan akan dapat mengawal risiko penyakit yang disebabkan jangkitan COVID-19, meringankan beban terhadap sistem penjagaan kesihatan negara dan lebih penting lagi, memulihkan kehidupan seharian pasca COVID-19 agar kembali kepada norma dan sekaligus memulihkan keadaan ekonomi negara yang telah terjejas disebabkan pandemik.

6. Pemulihan negara adalah tanggungjawab kita bersama di mana peranan orang awam merupakan faktor kritikal dalam menjayakan apa jua strategi Kerajaan. Di atas kerjasama semua pihak setentunya sangat-sangat dihargai. Kita hendaklah terus berdoa dan sama-sama berusaha di samping bertawakal kepada Allah Subhaanahu Wa Ta'ala supaya kita terselamat daripada penyakit wabak COVID-19

JABATAN PERDANA MENTERI

Jalan Perdana Menteri

Bandar Seri Begawan BB3913

Negara Brunei Darussalam

24 Safar 1443 / 1 Oktober 2021